



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

12. Kalenderwoche – ab 21. März 2010

Welle mid Schaum

Nu dudor mir ja schon fasd widdor leid, unsor Außenminisidor! Alle meggorn ibor dähn! Un daderbei kannor ja nischd dafiehr, dassor so is, wieor is. Dähr is ehm so mid dähm Linksdrall geborn wordn. Un ooch de geisdischn Bodenzn sinn angeborn. Wenssde bleede geborn bisd, dann bisde ehm bleede! Wenssde schlaun bisd, dann bisde schlaun! Das is bei alle Mänschn so. Bei unsorm Außenminisidor scheind nu eene ausgeschbrochn schwierische Mischung vorzulieschn, was de geisdischn Bodenzn bedreffn dud. Off dor een Seide is dähr nisch bleede - da dud dähr sähr geschiggd de eischnen Indoressn un de Indoressn seinor Sippe vordrähdn un befördorn... - da is keenor, dähr nisch irschendeen kleen Vordeel gezochn had, seid dor Guido an dor Däde is. De FDB soll ja sämdliche gudn Bosdn in die Minisderiums, in die, wose jedzde das Saachn ham... also, alle gudn Bosdn ham die an de Bardei- un sonsdische Freinde vordeeld. Sozusachn eene Neuoffdeellung dor Fuddornäbfe!

Un ooch wenn dor Guido off Reishn gehn dud, da dud dähr an seine Näschsdn denkn. Ganz uneischnnidzisch! Nee, da kammor dähm Guido keen Egoismus vorwärfn! Das is Veddornwirtschafd vom Feinsdn! Dähr dud nisch bloß an sein eischnen Hindorn denkn! Nee, dähr dud vornähmlich an annre ihre Hindorn denkn. Dass die es scheen warm un weisch ham! Wobei ehm ooch bei solsche Leide, wie dor Guido eenor is, dor Hindorn e Körbordeel is, was eene ganz besondore Bedeutung besidzn dud. Bei die Sorde Leide! Un Männor sinn ja ooch bloß Leide!

Abor ma nähmbei - ob das nu sähr ginsdisch fiehr Deuschland is, dass mir so eene Ard von Leid als Außenminisidor ham, das weeiß isch nisch! Das kann ja ooch manschma zu schwähre Broblehme fiehrn. Isch meene, nisch in alle Ländor sinn de Mänschn so dollorand wie mir hier! Un mir sinn

das ja ooch noch nisch sähr viele Jahre. Un mansche Ländor sinn uns ehm noch e baar Jahrzehnde hinnorhähr. Villeischd sogahr e baar Jahrhunnorde. Wenn dann nu dor Guido mid seinor Firsd-Lehdy zum Schdaadsbesuch eindreffn dud... also, mid dor Firsd-Lehdy, die ja beim Guido e Firsd-Menn is... es kennde in mansche Regiohnen dor Weld bassiern, dass dähn Guido samd Firsd-Menn einschberrn dun... odor schdeinischn! Weeschn Siddnvorschdoss odor Erreschung öffendlichn Ärschornisses! Un dann missn mir dähn widdor freikoofn!

Odor wennis bei eim Schdaadsbesuch een Ball gähm dud, wo dann dor Gasdgähbor ooch ma mid dor Firsd-Lehdy vom Besuchor danzn dun muss... weil das Brodogoll das so vorschreim dud... - das kann doch eschd in de Hose gehn!

Nee, ob dor Wesdorwelle werglich zur Dauorwelle wern dun söllde, so als Vordrähdor dor Deudschn Indoressn in dor Weld...? Wo ja sogahr dor Seehofor gesachd had, dass dor Wesdorwelle keene Dsunahmi is, sondorn bloß eene Welle mid Schaum. Was soll isch denne da noch sachn?

Eduard Sachsenmeyer